



La suprastanza da la «Selva» cun singuls giasts. (da an.) Jürg Michel, Leo Thomann, Mario Cavigelli, Vital Lötscher, Alfred Barbüda, Gian Cla Feuerstein, Stefan Engler e Markus Brunner.



Sa drizzà als preschents è er cusseglier guvernativ Mario Cavigelli (dretg).

FOTOS G. N. STGIER

«Nus duvrain urgent ina resgia»

Associazion grischuna d'economia forestala

DA GION NUTEGN STGIER / ANR

■ **Nua ir e nua vender tut il lain grischun? Quai è da preschent il pli grond quità dals selviculturs, dals reviers forestals e dals manaschis da lain. En singuls gauds da noss chantun saja il dumber da la selvaschina er memia aut è vegnì ditg ier a la radunanza generala da la «Selva» a Schiers/Aschera.** Dapi in onn è *Leo Thoman* da Parsonz president da la «Selva», l'Associazion grischuna d'economia forestala. Quai è l'organisaziun che unescha bunamain tut las persunas e manaschis che han en ina moda u l'otra da far insatge cun lain, ubain cun il gaud.

La «Selva» s'engascha dentant er per la promoziun dal product lain e segna er per la scolaziun supplementara da lur commembers. Actualmain ha l'associazion 50 commembers singuls e 123 commembers collectivs, sco vischnancas, manaschis da lain e reviers forestals. Giast dals selviculturs, bostgers ed impressaris da lain è er stà *Mario Cavigelli*, cusseglier guvernativ e schef dal departament selvicultural. El ha cunzunt fatg attent a l'impurtanza dal gaud e dal lain en il Grischun, che saja cunzunt betg mo in material da construcziun, mabain haja il gaud er ina funcziun da protecziun. Ina terza dal chantun saja gaud ed ina gronda part da quel saja

gaurd da protecziun. Grazia a quel sajan er numerusas vals accessiblas, ha menziunà il cusseglier guvernativ.

Da gronda impurtanza per l'economia publica e regionala

En il sectur da lain lavuran tuttina radund 4000 persunas e qua tras saja l'entira chadaina dal lain da gronda impurtanza er per l'economia publica e per l'economia regionala, ha punctuà *Mario Cavigelli*. El ha lura er anc ditg che 90% dal gaud appertegna a las vischnancas. *Leo Thomann*, il president da l'associazion ha ditg che tar fusiuns da vischnancas saja d'avantatg sch'in revier forestal saja avunda grond, uschia ch'ils selvicul-

turs e bostgers hajan betg da s'occupar cun autras lavurs. Quai saja pero da revier tar revier different e dependia da la grondezza dal revier. Intgins reviers forestals sajan bunamain dependents dad autras lavurs sco per exempel rumir naiv ed auter pli.

Chattar plaunet ina soluziun

Quai che pertutga il diever da l'areal da l'antieriura resgia a Domat ha la «Selva» il sustegn dal chantun. *Mario Cavigelli* ha ditg che in dals pensums difficils saja bain da chattar ina via da puspè savair nizzegiar quel areal. *Leo Thomann* ha ditg che da preschent na possia ins betg vender il lain en noss chantun per resgiar

e per far diever da quel, perquai ch'i manca ina gronda resgia. Actualmain avain nus d'exportar il lain cunzunt en l'Austria e quel export saja cumbinà cun gronds custs, manegia *Leo Thomann*. Ils pretschs dal lain sajan da preschent er modests cun 110 francs per cubic per lain da qualitad e 70 francs per lain da damain qualitad. Per ils possessurs da lain saja ina nova resgia gronda indispensabla, ha ditg il president dals selviculturs. Per garantir en l'avegnir la creschientscha dal gaud saja en singulas regiuns da noss chantun urgent da chattar ina schliaziun per reducir il grond dumber da la selvaschina è er vegnì ditg als var 70 preschents.